



Dili, 27 Maiu 2011

**Exmo. Sr. Dr. Josè Ramos-Horta**  
**Prezidente Republika Demokratika Timor-Leste (RDTL)**  
Dili, Timor-Leste  
**Kona-ba : Dekretu Lei Kompani Mina-rai Nasional Timor GAP, EP**

Exmo. Sr. Prezidente ne'ebe ami respeito,

Foin dadaun iha loron 25 Maiu 2011, Konseilu Ministru aprova ona Dekretu Lei atu kria kompania mina-rai nasional, Timor GAP, EP. Tantu ami hanoin mos iha loron balun ne'e nia laran, Prezidente Republika sei uza nia kompetensia ne'ebe Konstituisaun RDTL Artigu 88 haruka atu promulga ka veta ba dekretu lei ne'e.

La'o Hamutuk rasik seidak hetan verzaun final ba lei ne'ebe dadauk ne'e Konseilu Ministru aprova, maibe iha oportunidade ida ne'e, ami hanoin atu hato'o ba ita boot atu konsidera asuntu balun ne'ebe ami hanoin sei sai obstaklu ba ekonomia, legal, no governasaun husi estabesimentu Timor GAP, EP ne'e ba Timor-Leste nia futuru.

Iha fulan Novembru 2010, ami partisipa ona iha konsultasaun publiku ne'ebe Sekretariadu Estadu Rekursu Naturais halao, hodi halo analiza no hakerek pontus balun ne'ebe ami konsidera bele hetan atensaun husi estadu Timor-Leste iha esbosu dekretu lei ba kompania mina-rai nasional. Tamba ne'e, ami hanoin atu sujere analiza ne'e nudar referensia ba ita-boot atu foti desizaun, mesmu ami hanoin karik iha ona mudansa balun iha dekretu lei atual, maibe ami espera katak analiza ne'ebe ami hato'o ne'e, bele ajuda ita-boot atu bele foti desizaun ida ne'ebe prudente no sei benefisia povo Timor-Leste tomak. Ami nia analiza mak hanesan tuir mai:

- PETRONATIL ne'e perigozu, no ita tenke aprende husi falansu no susesu husi rai seluk.
- PETRONATIL tenke estabesele husi lei Parlamentu, laos dekretu lei Governu nian.
- PETRONATIL tenke serve povo Timor-Leste.
- PETRONATIL tenke tuir regulamentu ba ajensia estadu nian.
- PETRONATIL presiza atu transparante no akuntavel.
- PETRONATIL tenke dezeitna atu prevene korupsaun.
- PETRONATIL labele hetan poder ne'ebe maka'as liu fali saida mak nia hakarak.
- PETRONATIL nia lukru tenke ba liu Fundu Petroleu, laos investe deit iha kompania.
- PETRONATIL labele hetan poder atu halo impresta ka fan asoens (Bonds)/obligasi.

Atu kompleta liu tan, ami anexa karta ida ne'e ho ami nia Submisaun ba Sekretariadu Estadu Rekursu Naturais, mos iha <http://www.laohamutuk.org/Oil/PetRegime/NOC/LHSubPetronatil24Nov2010En.pdf>. Bele mos liga ba : <http://www.laohamutuk.org/Oil/PetRegime/NOC/10Petronatil.htm> atu hetan informasaun, analiza no komentariu kona-ba kriaun PETRONATIL.

Mak ne'e deit ami nia karta ne'e ami hato'o, no ba ita-boot nia konsiderasaun no kolaborasaun tomak ami hato'o obrigado wain.

Juvinal Dias

*Ekipa Rekursu Naturais La'o Hamutuk.*

Charles Scheiner